

奉天通志

十五函之五

奉天通志卷二百四十一

藝文十九 文徵

文徵十三 外編 文 清二

耿仲明

字雲臺先世山東人徙蓋州衛由總兵官封懷順王晉封靖南王 按此文應入內編誤置於此

創建興隆寺碑記

順治己丑季秋

蓋自開闢以來天位乎上地位乎下然先天地而主宰陰陽後天地而化育萬物於穆玄虛清□靜□法宗三教道妙兩間無色相無老死太乙之清渾元之誠瞻之仰之莫睹莫聞若無法象金身禪房殿宇世之人皈依無主修證無門故衣珠求乞提燈覓火者多矣而釋子俱安性志玄照寬福等自幼梵修中年精進標守素書塵凡德行已登道岸明朝仰重全國增光養靜三韓流風箕域

斯時也我清聖主建極中華凡遼左鄉紳士庶多皆隨駕西移遐
荒寥寡地闊人稀其古刹舊跡廢弛殆盡卽言修葺者常歎乏人
誰敢有興創造之議者倏爾虔誠感格靈可徹天一心好善衆善
皆歸一人作福諸福咸集洪安等正在籌謀之際如何啓建如何
寺名適有瀋陽之西海州之北亙古有一興隆寺目今頽塌恭逢
聖旨擬將本寺鼎建興隆輒行斯舉因之而□添□陳邦文王定
乾三人年高有德願爲功德之首簡得榮則爲寺主勸善募化而
十方善信樂從喜捨舉筆登名千金立至不數月間殿宇巍峨雕
樑畫棟山門鎮聳護法莫明裝塑諸佛中釋迦東藥師西阿彌左
文殊西普賢十八羅漢阿難迦葉韋馱天尊金剛等聖浩大工程
輝煌盛美洋洋乎可瞻可仰有睹有聞皆得皈依修證者非其懇

切精誠之至而誰耶是所謂今日之開創於無疆者正可垂芳聲於不替也予仲明生長蓋牟從來奉佛視斯篤祐非常謹識始初發基肇端之由以爲千百世之一證云爾清順治己丑歲季秋月

蓋平縣志

王胤祚

順天文安人順治丙戌進士奉天府尹

重修鐵嶺縣城隍廟記

康熙九年

先是鐵嶺令以修建廟宇之文驛聞之時康熙八年八月之十九日也邑舊爲衛荒廢者五十年土人指點其地曰此城隍廟也鞠爲茂草曷修之余復其文曰如議速行要在不擾民間爲善耳功旣成神有寧宇矣鐵嶺令又以文驛聞之則康熙九年二月之三日也正殿三間土地祠一大門南北長二十五丈東西七丈六尺

經營於去歲之秋斷手於今春之仲無侈前人無廢後觀照舊制也又曰有司分內耳其何敢言功至於助義而向善者不可不圖其勞也余則以爲令總之者爾非募緣人役將何所勸勉焉非輸助各官將何所取資焉非輸助舊人暨衆民將何所庀工而度財焉倡義緣於衆人廟貌新於一旦謀所以不朽者其不可以已也余於是而更有所感矣夫邑令治明者也城隍治幽者也自天子治都與外之府州縣罔不崇焉考太常誌有之凡春秋郊廟日月帝王先師後三日復遣堂上官恭代行禮是日也東嶽之祠與壯繆之祠皆與焉而首重者曰都城隍大典煌煌蓋有年所矣今夫世人亦求福之爲耳是以廟貌有雄而毅黝而碩者則曰將軍有溫而慧哲而少者則曰某郎其居處敞之以庭堂峻之以階級其

祭祀則椎牛擊豕魚菽牲酒缺於家可也缺於神則不可夫遵朝廷之祀典所以順雨暘禦災患以視夫祀無名之土木者何如也不寧惟是甚有媼而修飾者則曰姥有婦而矜麗者則曰姑堂構之壯也禱祀之豐也衆之力樂爲竭也一朝懈怠禍亦隨作耄孺畜牧慄慄然疾病死喪不曰適丁其時而自惑其生悉歸之於神夫舍不易之典而邀媚淫祠又爽徵應之理如是其可乎哉鐵嶺之士若民其稟法度有然矣其敬鬼神有然矣則道義修明絃誦不作家給戶足禎祥畢臻又皆其可以環至而立效者也余老且病縻於茲三載不能引去然睹善事一若慰一若驚慰則喜其善之既著也驚則駭其事之如創也余與令皆借是以少追神人之恫是不可不爲之記也

王益朋

字鶴山浙江仁和人順治乙未傳臚吏科左給事中官至太僕寺卿

請定遼陽規制疏

順治十四年

奏爲請定豐鎬神區規制仰祈勅議修舉以重萬世根本事臣惟時訕舉羸難與慮始然事關重大貴在開先始之規模不立則無以垂奕世而示來茲臣有一得之愚可以厚功臣收地利明官守宣教化重根本備海防者敢爲皇上陳之臣稽載籍歷代建都不一明洪武都金陵永樂遷北平以金陵爲南京雖各功臣隨遷於燕而所賜田產皆委家人莊頭在彼耕種收穫租糧供送本主原非罄國而遷置舊都於偏廢也我朝定鼎燕京則遼陽發祥之地實猶昔之南京也自墨勒根王苟且補苴而陪京規制闕焉未舉幸皇上親政加意根本懸爵招民權宜鼓舞究竟所招不多生聚

無幾開墾未廣名器徒輕頃見遼陽知府張尙賢招徠不繼一疏有云去歲自春徂秋招頭絕跡開創遼陽原出自皇恩請勅部設法招徠或此法難行更有彼法可通等語而部覆以爲招民之例原經會議題定已屬破格鼓舞臣部無庸再議臣愚以爲與其懸爵招民應之者少不如倣明初之制將遼陽等處田地酌量分給功臣之家令其委託家人莊頭耕種收穫供送本主彼之地利旣熟而辦種必饒又無煩司農之籌畫者況八旗兵丁加以連年水患戶部議給漕糧公私兩受虧耗孰得孰失明白易見至於近畿之地圈給八旗朝廷雖有撥償恐難盡如原數以臣愚計莫如卽將遼陽所屬餘地查數撥補有力之家不妨多給在畿民無失業之虞不獨無地而有地在朝廷鮮拋荒之患亦可因地而得民較

之近日懸爵招徠其間容易繁難相去逕庭矣且旗下舊人常言關東土地肥饒可惜拋荒無人耕種由此觀之諒亦臣民所樂行者此所謂厚功臣收地利之一也其陪京舊制設有文武諸司而科道糾參之責部司權關之差咸得與焉查洪熙宣德在儲位時亦曾南京監國不止勲臣留守今遼陽旣稱盛京則應查照會典量設部院科道滿漢官員按時修舉諸大典禮至於舊時衙宇似未盡壞略加修葺所費不多所關實大又知府張尙賢全遼文運已開一疏內云遼陽士子遵旨出關攜妻挈子千里播遷情尤可憫較之寄籍在遼之永平生員視嚴綸爲故紙畏出關如虎穴不啻雲泥等語臣愚以爲士爲四民之首自當遵旨奉法爭先恐後以風小民何得藐視法紀如府臣所云者伏請皇上嚴勅盡令出

關各還故土勤學力農一勞永逸則其親友相依攜帶人口正自不少如有直省俊秀人等願赴遼試者許其全家移住卽與田產入籍應試每五名一爲互結立法之初暫寬冒籍之禁大抵不在本地開科則人情不肯爭相趨赴於作養士子之中寓招徠人民之計此所謂明官守宣教化之一也至於遼陽等處歷代以來皆爲郡縣明初盡改置衛止於遼陽開原設安樂自在二州我朝初設一府兩縣其餘各城俱未建置見今海寇未殲風候莫測有備無患機要宜詳臣思祖宗陵寢所在王氣攸鍾實爲重地若不預爲防維則濱海地方一旦賊艘飄忽而至其何以應之臣愚以爲自山海以東凡大小衛所城池俱當建置郡縣設立防守拱護聯屬生聚教養在此一舉此謂重根本備海防之一也抑臣更有請

者盛京興王重地自是上國規模明洪武陞集慶爲應天永樂陞北平爲順天嘉靖陞安陸爲承天今遼陽府名亦宜陞用天字知府應改府尹則名正言順足法後世至於前代大小臣工怙過不悛或調發南京使之砥礪修省果能悔過仍復調回今以衛蠹罪犯徒發遼陽雖亦填實畿輔之一端然而非法之善也夫寧古塔尙陽堡尙可比之前代邊遠之處而遼陽左右旣屬盛京當如明之應天等處商賈輻輳士民樂居住麗富饒斯稱天府豈可使罪人雜處其間哉且此輩舞文狡猾其心必異子孫習染種類不端敗壞風俗尤其小者釀亂思逞勢所必然更不可不早爲區別也臣蒙皇上知遇之恩感奮思報知無不言至於斂怨招尤臣不暇顧如果臣言可採統祈乾斷修舉施行

皇
奏
議
清

楊名聲

海城正藍旗人
貢生寧遠知州

寧遠州署記

寧遠關東一要會也首山峙其東大海襟其南西距榆關北接邊鄙層巒疊嶂隱隱隆隆雄麗甲三韓爲遼瀋門戶而興廢相尋成毀遞見非獨氣數使然亦人事之得失也我朝定鼎以來招徠流遺念藩衛重地爰立州治以撫綏焉余於康熙丁未春來守茲土維時草昧初開哀鴻甫集方將宅爾宅田爾田猶未遑也何敢以土木勞民爲州署計然臨民出政固陋貽譏人將咎余經始之未臧也爰進僚屬而規畫之捐俸鳩工集材營繕自門及堂自堂及寢東爲土地祠西爲羈候所修葺者十楹增建者二十有六周圍垣棘儼然具體不動民間一草一木一絲一粒而四旬告竣吏民

咸樂觀厥成亦安余之不擾也有謂余者曰昔宋詔節度觀察刺史知州等官其治所廨舍修葺建置而不煩民者加一選朝廷亦將於公之功加錄焉余曰是則惡乎敢亦曰州治新設百度未貞草創規模庶幾無忝於經始云爾是爲記

康熙盛京通志

郝浴

直隸定州人順治己丑進士官至廣西巡撫

送劉心周歸中州序

吾道值周顯王三十三年乙酉有鄒國孟子與首嚴義利之辨覺諸侯距楊墨暨本朝世祖皇帝順治十六年己亥輒千九百九十五年矣於漢武帝建元元年辛丑有廣川董仲舒以道爲適治之路而窮其原於天人三策以歆帝衷暨今己亥亦千七百九十九年於平帝元始五年乙丑有蜀郡揚子雲慮世趨日惑至辱其身

不死作太玄法言以至理詔後世暨今己亥亦千六百五十五年
於隋高祖仁壽二年癸亥有龍門王仲淹投太平十二策不錄退
修盡性知命之教於河汾暨今己亥亦千五十七年於唐憲宗元
和十四年己亥有南陽韓退之諫迎佛骨手扶孟子之學憤發所
向以蹴踏二氏暨今己亥亦八百四十一年於宋神宗熙寧二年
己酉有河南程明道咫尺天顏獻正心窒欲之方及哲宗元祐元
年丙寅又有程伊川啓沃經筵復請延天下道德之士兩賢以居
敬窮理爲斯世斯人開入德造道之門暨今己亥亦五百九十一
年於光宗紹熙五年甲寅有新安朱仲晦侍講煥章建極道民力
整乾綱常提撕此心如日之升至今己亥亦四百六十六年於元
世祖至元十七年有河內許仲平以祭酒歸家一惟致知力行躬

牖學徒暨今己亥亦三百八十年於明英宗天順元年丁丑有河汾薛德溫總裁天下會試以復性正學爲準至謂五經四書一性字括盡暨今己亥亦二百三年於武宗正德十三年戊寅有餘姚王伯安智擒逆藩而其學卽以良知爲宗暨今己亥亦百四十二年浴俯仰二千年中赫赫名公卿崇至尊以福天下何慮九牛之尾而至謂修明吾孔子所傳大學之道粗不雜於五霸七雄精不詭於百家二氏將使人心人理爛然犂然得歸於大中至正而無一絲之或悖則數君子之功雖與日月爭光可也然斯傳一墜動至數千百年不得值大量者脫鍵撤鑰而升其堂其傳卒以不緒故天下愛而悲之曰絕學順治己亥陳留劉心周謫鐵嶺卓然若有志於數君子之爲者異哉浴察其苦心極力周五寒暑不退竊

壯其志而病其質至今上康熙二年癸卯得比例西歸洛立喜其有豁然之日矣夫中州奧區也山川人物明秀萬方今一旦縱居其中請得力雪舊抱日與二三學子登嵩陽泛洛水嘲風弄月更得騎太行而摩函谷左顧伊川右睨橫渠有一日焉見此中浩浩瀚瀚晶晶瑩瑩若大海之飛濤捲雪而輒復一鏡萬里也然後揭廬於百泉蘇門之上危坐其中以究數君子之用心吾兄其有入

乎

康熙
縣志

銀岡書院記

鐵嶺古銀州也浴甲午九月謫奉天戊戌五月下嶺卜築於南門之右方十許畝中爲書屋三間前有圃種蔬後有園種花左壁吾臥室也右壁一帶皆吾友連屋而居也屋中造瓦牀一丈風月之

夕吾友畢來盡登牀趺坐牀下鑽火烹茶漉酒縱談名理至夜分不散架插天下古今圖書恣吾友展玩有化人來則焚香晤對參驗竺乘屋後一岡隱然龍臥所謂銀岡者也雨後登之見郭外羣山紫翠交寫其北山綿亙西繞而東山迤邐南屬簇擁萬狀中控一背是爲鐵嶺然總維吾一線之銀岡殆物之有鼻祖者乎記吾岡下所種桃李皆數度開花而成實矣所舉二三犬子亦褻然冠而似丈夫矣吾歸之歲歲德在卯西牕北有杏一株發花數十蓓如蠟撚白梅香色雙絕而花枝婉轉皆回頸視西是皆不足記獨念吾霜天雪夜一燈炳照大靜之餘徹四壁於環海晤羣聖於斯須截然有覺心目爲豁於戲非吾銀岡吾安得有此一日也非吾至尊吾安得有此銀岡之一日也泣撫銀岡留爲書院有踵至吾